

მოდის, მოხშირდის, ჭადარავ
(სიმღერა)

მოდის, მოხშირდის, ჭადარავ,
წვერ-პირი მორთე თეთრად,
ეხლა იარონ იქნება
ჭკვამ და გულისთქმამ ერთადა.
მომწყინდა გულის ჯახირი,
დამღალა მისმა ბგერამა;
დღეს-აქამოდე მის ღელვა
ვერ დამშვიდა ვერამა; -
ბერ მუხად გულში იფარჩხვის,
რაც მიანდერმა დედამა, -
დაწურა, სისხლად დაწურა
ქვეყნის უღმერთოდ რბევამა;
ტანზე ამასხა ეკალი
საფლავთ წინაპართ კვნესამა,
აკლდამეზიამ მწყრომარედ
იმათმა გადმოხედვამა.

1895 წ.